

# Maybelle Meryl Maurice harumkan nama CI@UMS

## Cemerlang dalam Pertandingan Jambatan Mandarin kali ke-2 Peringkat Antarabangsa 2022

UB 27.12.2022 P.06

**KOTA KINABALU:** Pelajar sekolah rendah yang mewakili Confucius Institute Universiti Malaysia Sabah (CI@UMS), Maybelle Meryl Maurice mengharumkan nama institut tersebut apabila mencatatkan pencapaian cemerlang dalam Pertandingan Jambatan Mandarin kali ke-2 Peringkat Antarabangsa 2022

Maybelle yang merupakan pelajar Sekolah Jenis Kebangsaan (SJK) St. Peter Telipok berjaya menempatkan diri sebagai salah seorang daripada 15 pemenang hadiah kelas pertama dalam benua Asia bagi Kategori Sekolah Rendah pada pertandingan tersebut.

Menurut kenyataan dari CI@UMS, kejayaan tersebut sekali gus mengatasi pencapaian wakil CI@UMS, Adriel Cendric yang memenangi Anugerah Populariti Terbaik pada edisi pertama pertandingan

tersebut tahun lalu.

“Pertandingan berkaitan Bahasa Mandarin peringkat antarabangsa ini terbuka kepada pelajar sekolah rendah bukan keturunan Cina, dan merupakan satu pentas istimewa untuk menguji penguasaan Bahasa Cina dan budaya Cina dalam kalangan murid-murid bukan keturunan Cina.

“Pertandingan kali ini disertai hampir 5,000 kanak-kanak dari lebih 40 buah negara di seluruh dunia,” menurut kenyataan tersebut.

CI@UMS turut menjelaskan, selepas pusingan awal pertandingan yang ditapis melalui persembahan tayangan video, 50 peratus peserta yang telah dipilih ke pusingan seterusnya akan mewakili benua masing-masing untuk bertanding dalam peringkat akhir global.

“Semasa peringkat akhir global, wakil dari lima benua melawat Beijing secara dalam talian, yang

bertujuan lawatan sambil belajar di samping mendalami budaya Cina di 10 buah tempat terpilih di Beijing.

“Antara tempat-tempat yang terkenal ialah Kota Larangan Beijing, yang memiliki sejarah China yang lama; Stadium Nasional China yang berteknologi canggih; Tembok Besar China yang megah; Qianmen Beijing yang meriah, dan tempat-tempat lain.

“Lawatan ini telah menambah pengetahuan dan memberi kesan positif yang mendalam kepada semua peserta,” katanya.

CI@UMS turut berharap lebih ramai lagi murid-murid dari seluruh Sabah akan menyertai Pertandingan Jambatan Mandarin pada edisi tahun hadapan.

**CEMERLANG:** Maybelle (barisan tengah, dua kiri) bersama pemenang hadiah kelas pertama lain di Asia.

